

# Informasjonsstrategi for Kontrollutvalet

---

«Det paaligger Statens Myndigheder at legge Forholdene til Rætte for en aaben og oplyst offentlig Samtale.»

Kongeriget Norges Grundlov § 100 sjette ledd

## Mål og visjon om informasjonsarbeidet i Sogn og Fjordane fylkeskommune

Det er tre hovudmål i Plan for informasjonsarbeidet i fylkeskommunen: Folk, næringsliv og organisasjonar skal:

1. Ha lik og god tilgang til å delta i dei demokratiske prosessane.
2. Få korrekt og relevant informasjon om rettar, plikter og mogelegheiter.
3. Ha god og reell tilgang til informasjon om fylkeskommunen sine aktivitetar.

Fylkeskommunen kan berre løysa oppgåvene sine på ein effektiv måte gjennom eit positivt og aktivt samspel med innbyggjarar og brukarar. Godt **informasjonsarbeid** og kommunikasjon er ein føresetnad for at fylkeskommunen skal kunna løysa oppgåvene sine som utøvar av mynde og produsent av gode og tilpassa tenester for folk, næringsliv og organisasjonar.

Informasjonsarbeidet skal òg gje folk, næringsliv og organisasjonar høve til god kontakt med fylkeskommunen.

Fylkeskommunale nettstader skal vera brukarvennlege og oppfylla internasjonale retningsliner for design og universell utforming. Dette vil og ivareta behova til dei funksjonshenna. (WAI/W3C).

Nynorsk er fylkeskommunen si offisielle målform.

## Kommunal- og regionaldepartementet om synleggjering av kontrollutvalet

Kommunal- og regionaldepartementet kom i sin rapport ”85 tilrådingar for styrkt eigenkontroll i kommunane” med fylgjande oppmodingar på side 11:

- *Kontrollutvala gjer ein jobb dei kan vere stolte av: Kontrollutvala må fortelje om kva dei gjer, og kommunestyra må lytte!*
- *Kontrollutvala, revisorane og sekretariata gjer mykje godt arbeid: Vis det, legg rapportar ut på nettet og skriv så alle kan forstå!*
- *Det nyttar å drive kontrollarbeid: Kommunane må vise at dei lærer og forbetrar seg! La innbyggjarane få vite om det!*
- *Kontrollarbeid i ein kommune kan føre til læring for andre òg: Kontrollutvala må dele erfaringar med kvarandre!*

I den nemnde rapporten på side 10 står det:

*Kontrollarbeid som blir kommunisert, vil ha verdi for fleire enn den som blir kontrollert. Kommunikasjonen kan vere retta innover i kommune og ut mot omverda.*

Vidare står det i rapporten at ein kan bygge tillit til innbyggjarane ved å fortelje at det går føre seg kontrollarbeid, og kva resultat dette arbeidet fører til. Godt kontrollarbeid kan vere med på å bygge opp eit godt omdømme for fylkeskommunen.

Kommunal- og regionaldepartementet kom i februar 2011 med ein rettleiar om kontrollutvalet si rolle og oppgåver. I denne rettleiaren er det eit eige kapittel der synleggjering av kontrollutvalet sitt arbeid vert omhandla. På side 69 kan vi lese:

*Åpenhet er i seg selv et mål for den offentlige forvaltningen. Synliggjøring av kontrollutvalgets arbeid vil være viktig for å skape tillit til at kommunen er underlagt betryggende, folkevalgt kontroll.*

## **Kontrollutvalet sitt ansvar og sine oppgåver**

Kontrollutvalet har ansvaret for tilsynet med den fylkeskommunale forvaltninga på vegne av fylkestinget. Utvalet skal vera bidragsytar til at fylkeskommunen når sine mål, gjennom å bidra til i sikre ein best mogeleg forvaltning av ressursane.

Kontrollutvalet skal medverka til å byggja opp om tilliten til fylkeskommunen som tenesteytar og utøvar av mynde.

Kontrollutvalet skal vera synlege, uavhengige og ha høg integritet. Utvalet har valt å ha opne møte, og informasjon om utvalet sitt arbeid skal vere tilgjengeleg på heimesida til fylkeskommunen. Informasjonsstrategien skal styrka forståing for utvalet si oppgåve og bidra til at utvalet når måla sine.

I verksemdplanen til kontrollutvalet i fylkeskommunen finn vi følgjande overordna mål:

*Kontroll og tilsyn i Sogn og Fjordane fylkeskommune skal bidra til å sikre fylkeskommunen ein best mogeleg forvaltning av ressursane, til føremon for fellesskapet og enkeltmennesket.*

## **Mål for informasjonsstrategien til kontrollutvalet**

- Kontrollutvalet sin informasjonsstrategi skal vera i samsvar med Plan for informasjonsarbeidet i Sogn og Fjordane fylkeskommune.
- Kontrollutvalet skal aktivt vera i forkant med å informera om utvalet sitt arbeid.
- Kontrollutvalet skal ha ein medviten haldning til korleis utvalet framstår ovanfor omverda.
- Kontrollutvalet uttalar seg på fagleg grunnlag, og går ikkje inn i politiske diskusjonar.

## Målgrupper

### Innbyggjarane i Sogn og Fjordane fylkeskommune

Innbyggjarane i fylket skal ha mogelegheit til å følgje med på kva kontrollutvalet arbeider med. Det er viktig for demokratiet at arbeidet til utvalet er synleg og tilgjengeleg slik at det er høve til å kome med innspel. Den enkelte innbyggjar har krav på god og reell tilgang til informasjon om fylkeskommunen og kontrollutvalet sine aktivitetar.

### Eigen organisasjon

Tilsette i fylkeskommunen bør ha kjennskap til kontrollutvalet og det ansvaret utvalet har. Det er også viktig at medarbeidarane kjenner til kva utvalet arbeider med, noko som vil skape ein god forståing for utvalet sin funksjon.

### Media

Media bør ha kjennskap til kontrollutvalet sitt arbeid for å kunne sette seg inn i aktuelle saker som utvalet arbeider med som kan vere vesentlege for samfunnet og ha allmenn interesse.

### Kanalar:

Kontrollutvalet nyttar heimesida til fylkeskommunen [www.sfj.no](http://www.sfj.no) som offentleg kanal for å spreia informasjon om utvalet sitt arbeid. I tillegg vil kontrollutvalet orientere media om sitt arbeid gjennom pressemeldingar.

### Heimesida til fylkeskommunen:

Kontrollutvalet skal vere synleg på heimesida til fylkeskommunen. Utvalet har eit eige menyval under "folkevald styring", som bør innehalde følgjande informasjon:

- Om utvalet:
  - Mandat, oppgåver
  - Samansetjing
  - Lov- og regelverk
- Møteplan med sakslister og møteprotokoll
- Link til gjennomførde forvaltningsrevisjonar og selskapskontrollar
- Informasjon om revisorar og sekretær
- Plan for forvaltningsrevisjon og selskapskontroll
- Årsmeldingar

I tillegg skal nyhende om utvalet, saker som utvalet arbeider med og informasjon om møte med saksliste leggst på heimesida si framside.

### Media – lokale og regionale

Det skal sendast pressemeldingar til lokale og regionale media om kontrollutvalet sitt arbeid.

Pressemeldingar om kontrollutvalet sitt arbeid og vedtak, er viktig som ledd i utvalet si omdømebygging. Førstehands informasjon til media er viktig for å skapa og oppretthalda eit balansert og objektivt bilete av kontrollutvalet si oppgåve. Direkte kontakt med media og einskilde journalistar kan vere nyttig for å korrigere og betre informasjonsarbeidet.

I forkant av utvalsmøte skal det sendast ut pressemelding med sakliste, der ei eller fleire av sakene på saklista kan framhevast. Etter kvart utvalsmøte skal det sendast ut pressemelding med møteprotokoll der utvalsleiar har høve til å omtale ei eller fleire saker spesielt.

## Praktisk informasjonsarbeid

Publikum og media skal som hovudregel informerast i samband med kunngjering av saksliste til møte i utvalet.

- På www: kunngjering av møtetidspunkt, stad og saksliste
- Media: Det vert sendt ut pressemelding som informerer om innhaldet i utvalde saker.
  - Pressemeldinga skal som hovudregel utformast som ein journalistisk artikkel med tittel, ingress og brødtekst.
  - Informasjonstenesta kan hjelpe til med utsending og journalføring av pressemeldingar.
  - I særskilde høve kan det takast direkte kontakt med media.
  - Sekretær uttalar seg om faglege/prosessuelle spørsmål i forkant av behandlinga i utvalet. Utvalsleiar, eventuelt nestleiar, svarar for dei vedtaka som er gjort i utvalet. Utvalsmedlemmane kan også uttala seg, men då på vegne av seg sjølv, ikkje på vegne av utvalet.
  - Informasjonstenesta er rådgevande i saker det er tvil om.